

Na stranicama *Novog Muallima* 2010. godine prvi put smo otvorili *Forum* na temu mektepske nastave. Nakon tri godine, *Forum* ovoga broja ponovo posvećujemo ovoj važnoj temi. Zahtjev vremena u kojem živimo i za mektepsku nastavu donosi nova pitanja i izazove, te otvara potrebu za drugačijim i novim rješenjima. U ovom broju donosimo tekstove koji razmatraju dileme s kojima se susreće VPS Rijasetu IZ u BiH, ali i muallimi koji realiziraju mektepsku nastavu, te priloge koji predstavljaju moguća rješenja za neke od tih dilema.

U rubrici *Putokazi* donosimo tekst Enesa Karića pod naslovom “Žrtva, žrtvovanje, kurban”. Autor nam donosi uvide u kur’anski tekst, tradiciju Božijeg Poslanika, klasične jezikoslovne komentare Kur’ana, te specijalističke rječnike arapskog jezika koji objašnjavaju značenja ovih termina.

U rubrici sagledavanja *Muallim* predstavljamo dva rada. Mustafa Gobeljić piše o o utjecaju hadisa u kulturi obilježavanja značajnih vjerskih datuma i događaja Bošnjaka. U drugom tekstu iz ove rubrike, Ejub Velić donosi pregled najvažnijih rasprava koje su se u 20. stoljeću u BiH vodile o pitanju odijevanja muslimanki.

U rubrici *Muallim* donosimo tekst pod nazivom “Učenici”, iz knjige Mohameda Ismaila *Savjeti i djelotvorne strategije u nastavi – za mektebe i vjeronauku u javnim školama*. U drugom tekstu o kur’anskim kazivanjima u prizmi pedagoške važnosti priče piše Elvir Čamdžić, dok treći tekst autorice Melise Zukić tertira pitanja definiranja ciljeva majčinog odgoja u bošnjačkoj porodici.

Dva klasična vaza o temi hadža donosimo u rubrici *Islamske teme*, a vašoj pažnji preporučujemo i druga dva inspirirajuća teksta iz ove rubrike, koje potpisuju Rifet Šahinović i Ehsan Eydi.

Našim čitateljima posebno preporučujemo intervju s ambasadorom Nusretom Čančarom, koji predstavlja svojevrsnu analizu promjena koje su posljednjih godina zahvatile područja Bliskog Istoka i Sjeverne Afrike, stanje arapskih nacija danas, te događaje i posljedice “arapskog proljeća”. S ambasadorom Čančarom kroz opširan intervju, Muhamed Jusić, između ostalog, razgovarao je o izgledima za rješenje sirijske krize, o odgovornosti međunarodne zajednice i regionalnih sila za događanja u Siriji, te o realnoj opasnosti da se sunitsko-šiiitski konflikt nastavi produbljivati i da se on prelije i na neke druge muslimanske zajednice.

U rubrici *Historija obrazovanja* donosimo tekst “Idžazetname Mehmed ef. Handžića”, u kojem hafiz Đevad Hrvačić obrađuje tri idžazetname Mehmeda ef. Handžića koje ga svrstavaju među naše najveće alime.

U ovom broju objavljujemo hutbe Edin ef. Spahića i Muhamed ef. Šarića uz recenzije Mehe Šljive i hafiza Mevludina Dizdarevića. U rubrici pregled *Muallim* svojim čitateljima donosi prikaze knjiga vrijednih pažnje.

Senada TAHIROVIĆ